

2 hoben cu pa semper lo ta marca den e historia di Aruba



30 aña a pasa, pero nan nomber nunca mas lo wordo lubida, Antony Croes y Angelique Croes. E 2 hobennan scohi pa carga y hisa e bandera di Aruba pa prome biaha. Den un Wilhelmina Stadion, awe Stadion Guiermo Prospero Trinidad, completamente yen e bandera di Aruba a wordo hisa pa prome biaha pa e dos hoben nan aki cu a wordo scohi pa e trabou importante aki.

Hunto cu padvinders nan a practica varios dia con pa hisa e bandera pa nan no bai robes y pa e bandera por bula den tur su gloria pa henter Aruba por wak. E stadion tabata mas yen cu nunca, calculacion di polis a indica cu tabata tin mas o menos 10 mil hende presente. E hobennan aki, awe adultonan cu nan propio famia ainda ta corda e dia manera cu tabata ayera.

Celebracion di Himno y bandera na 1976



Den un Wilhelmina Stadion completamente yen pa asina celebra e prome dia di himno y bandera oficial pa Aruba. E dia aki 18 di Maart 1976 a pasa pa historia y awo ya caba ta 30 aña pasa cu e dos simbolonan di identificacion aki a wordo oficial. Den un ceremonia masha bunita cu a cuminsa cu un caminata cu a termina den stadion pa asina por a mostra e bandera y resona e himno oficial pa prome biaha. Coro di Maybeline Arends-Croes a presenta e himno mientras cu e hobennan Anthony Croes y Angelique Croes a hisa e bandera di Aruba pa prome biaha. E maestro di ceremonia e dia ey tabata Sr. Tico Kuiperi en felis memoria. Tambe riba e potretnan nos por mira Sr. Betico Croes (q.e.p.d) na momento di su discurso.